

四庫全書

子部

欽定四庫全書

冊府元龜卷八百二十二 宋 王欽若等撰

總錄部

尚黃老

太史公之論六家劉歆之奏七畧其叙黃老之旨載篇籍之數詳矣世之學者亦曷嘗無其人焉乃有敦清淨之訓以助治成化捐利祿之累以越世高蹈聚徒教授以傳述真宗立言敷演以發揚妙鍵注釋以啓深趣論

議以極遠致乃至霧仙通感神期冥會親受祕訣以享遐算豈誣也哉其或業與時契名叅俊選志存靈貺力營玄館波流頽靡增華競逐蓋與夫黜聰抱樸之說戾矣

老萊子楚人著書十五篇言道家之用

慎到趙人與齊人田駢接子楚人環淵皆學黃老道德

之術因發明序其指意到著一十二論

今慎子劉向所定有四十一篇

環淵著上下篇而田駢接子皆有所論焉

莊周梁惠王時為蒙漆園吏

蒙縣屬梁國

其學無所不闡然

其要本歸於老子之言故其著書十餘萬言大抵率寓言也作漁父盜跖胠篋以詆訾孔子之徒以明老子之

術

申不害韓人為昭侯相十五年終申子之身國治兵強無侵韓者申子之學本於黃老而主刑名著書二篇

韓非韓之諸公子喜刑名法術之學而其歸本於黃老

樂巨公

一名臣公又作鉅姓樂名鉅公者老之稱也

趙人善修黃帝老子之

言顯聞於齊稱賢師其本師號曰河上丈人不知其所
出河上丈人教安期生安期生教毛翕公毛翕公教瑕
公瑕公教樂巨公樂巨公教蓋公公教於齊高密膠
西為曹相國師

漢曹參為齊惠王相齊七十城天下初定王富於春秋
參盡召長老諸先生問所以安集百姓而齊故諸儒以
百數言人人殊參未知所定聞膠西有蓋公善治黃老
言使人請之既見為言治道其治要用黃老術故相齊

九年齊國安集大稱賢相

張良從高祖定天下乃稱曰以三寸舌為帝者師封萬戶位列侯此布衣之極於是足矣願棄人間事欲從赤松子遊耳乃學道欲輕舉位至太子太傅

陳平好讀書治黃帝老子之術位至丞相

田叔學黃老術於樂鉅公為人廉直喜任狹喜好也游諸

公位至魯相

直不疑學老子言其所臨為官如惟恐人之知其為吏

迹也不好立名稱為長者位至御史大夫

鄧公子章以修黃老言顯諸公間

汲黯為東海太守學黃老言治官民好清靜擇丞史任

之

擇郡丞及
史任之

鄭當時為大司農官屬好黃老言

班嗣彪從兄也雖修儒學然貴老嚴之術

老老子也嚴
莊周也臣欽

若等曰明帝諱
莊改字曰嚴

桓生欲借其書

桓諱

嗣報曰若夫嚴子者

絕聖棄智修生保真清虛澹泊歸之自然

澹泊安
靜也

獨師

友造化而不為世俗所役者也漁釣於一壑而萬物不

奸其志

奸犯也

栖遲於一丘則天下不易其樂不徒聖人

之罔

聖人謂周孔

不驕君之餌

餌謂爵祿君所以制使其臣亦猶釣魚之餌

蕩

然肆志談者不得而名焉

肆放也

故可貴也今吾子已貫

仁義之羈絆繫名聲之韁鎖

韁如馬韁也

伏周孔之軌躅

躅迹

也馳顏閔之極絜

絜至也人行之所極至

既繫繫於世教矣何用

大道為自眩曜

言用老子莊周之道也為自欲以名眩曜耳

昔有學步於邯

鄲者曾未得其髣髴又復失其故步遂匍匐而歸耳恐

以此類故不進

言不與其書

嗣之行已持論如此

後漢耿況與王莽從弟仍共學老子於安丘先生位至上谷太守

任隗字仲和少好黃老清靜寡欲位至光祿勳

鄭均字仲虞少好黃老書嘗稱病家庭不應州郡辟召後為議郎

蔡勲字君嚴邕之六世祖好黃老平嘗時為郿令樊融有俊才好黃老不肯為吏

樊瑞尚書令準之父也好黃老言清靜少欲

楊厚為侍中稱病歸家修黃老教授門生上名錄者三千餘人

翟輔好老子尤善圖緯天文歷算位至光祿大夫將作大匠

淳于恭善說老子清靜不慕榮名位至侍中騎都尉樊曄有俊才好黃老不肯為吏位至天水太守

周勰舉之子少尚玄虛不應徵辟嘗隱處窟身慕老聃

清靜杜絕人事巷生荆棘十有餘載

矯慎字仲彥扶風茂陵人少好黃老隱遯山谷因穴為室仰慕松喬導引之術

向長字子平河內朝歌人隱居不仕性尚中和好老易貧無資好事者更饋焉受之取足而反其餘

高恢京兆人少好老子隱於華陰山中

魏劉先字始宗博學強記尤好黃老言

王弼字輔嗣為臺郎何晏與弼祖述老莊立論以為天

地萬物皆以無為為本無也者開物成務無往不存者也陰陽恃以化生萬物恃以成形賢者恃以成德不肖恃以免身故無爵而貴矣

何晏字平叔以才名好老莊言作道德論位至尚書

袁寘精辨有機理好道家之言少被病未官而卒

晉嵇康學無師受博覽無不該通長好老莊位至中散大夫

向秀字子期清悟有遠識少為山濤所知雅好莊老之

學莊周著內外數十篇歷世才士雖有觀者莫達論其旨統也秀乃為之隱解發明其趣振起玄風讀之者超然心悟莫不自足一時也惠帝之世郭象又述而廣之儒墨之迹見鄙道家之言遂盛焉位至散騎常侍

司馬彪為秘書丞注莊子

郭象字子玄少有才理好莊老能清言注莊子位至東海王鈇太傅主簿

庾欽字子嵩為陳留相未嘗以事嬰心從容酣暢寄通

而已處衆人中居然獨立嘗讀老莊曰正與人意闇同
太尉王衍雅重之

河南郭象善老莊時以為王弼之惡歆甚知之每曰郭
子玄何必減庾子嵩

山濤字巨源性好莊老每隱身自晦位至司徒

謝鯤字幼輿少知名通簡有高識不修威儀好老易位
至豫章太守

郝愔及弟曇奉天師道而何充與弟準崇信釋氏謝萬

譏之云二郝謫於道二何佞於佛位至鎮軍將軍

張忠中山人隱於太山無琴書之適不修經典勸教但以至道虛無為宗其居依崇崑幽谷鑿地為窟室弟子亦以窟居去忠六十餘步五日一朝其教以形不以言弟子受業觀形而退立道壇於窟上每旦朝拜之食用瓦器鑿石為釜左右居人饋之衣食一無所受好事少年頗或問以水旱之祥忠曰天不言而四時行焉萬物生焉陰陽之事非窮山野叟所能知之其饋諸外物皆

此類也

葛洪尤好神仙導養之法著書言黃白之事名曰內篇
後為句漏令

鮑靚東海人常見仙人陰君授道訣百餘歲卒

宋何偃素好談玄注莊子逍遙篇傳於世位至吏部尚
書

羊欣素好黃老嘗手自書章有病不服藥飲符水而已
位至潯陽太守

沈演之家世為將而演之折節好學讀老子日百遍以義理業尚知名位至吏部尚書

孔靈符罷晉安太守有隱遁之懷於禹井山立館事道精篤每旦於靜屋四向朝拜涕泗滂沱東過錢塘北郭於舟中遥拜杜子恭墓

周續之字道祖鴈門廣武人年十二詣豫章太守范甯受業居學數年通五經并五緯號曰十經名冠同門稱為顏子既而閒居惟讀老易入廬山事沙門釋慧遠

沈道虔吳興武康人少仁愛好老易居縣北石山下精廬與諸兄子共釜庾而資困不改節

南督顧歡字景怡吳郡鹽官人年二十餘從雷次宗誥玄儒諸義晚節事黃老道以佛道二家互相毀著夷夏論雖同二法而意黨道教

宗則退居善易老累徵不起

杜京產吳郡錢塘人少恬靜閑意滌宦頗涉文義專修黃老

沈麟士吳興武康人隱居不就徵養身靜默著周易兩繫莊子內篇訓注老子要畧數十卷

徐伯珍東陽太末人好釋氏老莊之學兼明道術

梁嚴植之字孝源建平秭歸人少善莊老能立言位至中撫軍記室叅軍

太史叔明吳興烏程人少善莊老兼治孝經禮記其三玄九精解當世冠絕每講說聽者嘗五百人官至國子助教

柳愷少有大意好玄言通老易終鎮西安長史

阮孝緒陳留尉氏人年十三遍通五經十五冠而見其
父彥之誠曰三加彌尊人倫之始宜思自勗以庇爾躬
荅曰願迹赤松子於瀛海追許由於空谷庶保死生以
免塵論嘗著論云夫至道之本貴在無為為聖人之迹存
乎極弊極由迹用用有乖於本本既無為為非道之至
然不乖其跡則世無以平不究其本則道實交喪周孔
將存其迹故宜權晦其本老莊且明其本亦宜深抑其

跡跡既可抑數子所以有餘本方見晦尼丘是故不足
非得一之士闕彼明智體二之徒獨懷鑒識然聖已極
昭反創其跡賢未居宗更言其本良由跡須極世非聖
不能本實明理在賢可炤若能體茲本跡悟彼抑揚則
孔莊之意亦過半矣

陶弘景幼有異操年十歲得葛洪神仙傳晝夜研尋便
有養生之志謂人曰仰青雲覩白日不覺為遠矣止於
句容之句曲山自號華陽隱居始從東陽孫游兵受浮

圖經法徧歷名山尋訪經瀆天監四年移居積金澗東
弘辟穀導引之法年踰八十而有壯容位至奉朝請
庾承先潁川鄆陵人先學黃老兼涉釋教高祖詔徵之
不起居于五臺山講老子遠近咸來赴集

庾曼倩新野人孝元在荊州辟為主簿好黃老之言著
莊老議疏

馬樞字要理六歲能誦老子及長尤善老子
邵陵王綸為南徐州刺史嘗令學士講老子

陳周確字士潛博涉經史篤好玄言位至都官尚書

陸瑜嘗受莊老於汝南周弘正通大旨官至太子中書

舍人

金緩治周易老莊時人言玄者咸推之位至鎮南始興
王府詔議叅軍

後魏鄭修北海人少隱於岐南雅好經史專意玄門屏
迹人事不交世俗

程駿師事劉昞嘗謂昞曰今世名教之儒咸謂老莊其

言虛誕不切實要弗可以經世駿意以為不然夫老子著抱一之言莊生申性本之旨若斯者可謂至順矣人若乖一則煩偽生若爽性則冲真喪晒曰卿年尚稚言若老成美哉由是聲譽益播

北齊杜弼為通直散騎常侍中軍大將軍平陽公淹為并州刺史高祖又命弼帶并州驃騎府長史弼性好奇名理探味玄宗自在軍旅帶經從役注老子道德經二卷表上之曰臣聞乘風理弋追逸羽於高雲臨波命釣引

沉鱗于大壑苟得其道為工其事在物既爾理亦固然
竊惟道德二經闡明幽極旨冥動寂用周凡聖論行也
清靜柔弱語迹也成功致治實衆流之江海乃羣藝之
本根臣少覽經書偏所篤好雖從役軍府而不捨游息
鑽味既久疊疊如有所見比之前注微謂異於舊說情
發於中而彰諸外輕以管窺遂成穿鑿無取於游及有
慚於運斤不足破秋毫之論何以解連環之結本欲止
於門內貽厥童蒙無以近資愚鄙私備忘闕不悟姑射

凝神汾陽流炤盖高之聽卑邇言在察春未奉旨猥蒙
垂誘令上所注老子謹冒封呈并叙如別詔荅云李君
游神窅冥獨觀恍惚玄同造化宗極羣有從中被外周
應可以裁成自己及物運行可以資用隆家寧國義屬
斯文卿才思優洽業尚通遠棲息儒門馳騁玄肆既啓
專家之學更暢釋老之言戶列門張途通徑達事理無
申能用具表往賢所未悟遺老所未聞旨極精微言窮
深妙朕有味二經倦於舊說歷覽新注所得已多嘉善

卷八十二
之來良非一緒已勅殺青編藏之延閣又上一本於高
祖一本于世宗

盧臣客風儀甚美少有志尚雅有法度好道家之言

羊烈少通敏自修立有成人之風好讀書能言名理以
玄學知名位至義州刺史

後周盧光字景仁好玄言撰道德經章句行於世官至
陝州刺史

長孫熾頗涉羣書周武帝尚道法尤好玄言求學無經

史善於談論者為通道館學士熾應其選與英俊並游
通涉彌博

隋張美初仕後周為司成中大夫撰老子莊子義名曰
道言五十二篇

徐則東海郟人入天台山絕糧養性初在縉雲山太極
真人徐君降之曰汝年出八十當為王者師然後得道
也晉王鎮揚州知其名手書召之曰夫道得衆妙法體
自然包涵二義混成萬物人能弘道道不虛行先生履

德養空宗玄齊物深明義味曉達法門悅性冲玄怡神
虛白餐松餌朮棲息烟霞望赤城而待風雲游玉堂而
駕龍鳳雖復藏名台嶽猶且騰實江淮藉甚嘉猷有勞
寤寐欽承素道久積虛襟側席幽人夢想崑穴霜風已
冷海氣將寒偃息茂林道氣休愈昔商山四皓輕舉漢
廷淮南八公來儀藩邸古今雖異山谷不殊市朝之隱
前賢已說尊凡述聖非先生而誰故遣使人徃彼延請
想無勞束帛賁然來思不待蒲輪去彼空谷希能屈已

竚望披雲則謂門人曰吾今年八十一王來召我徐君
之旨信而有徵於是遂詣揚州晉王將請受道法則辭
以時日不便其後夕中命侍者取香火如平常朝禮之
儀至于五更而死肢體柔弱如生停留數旬顏色無變
晉王下書曰天台真隱東海徐公虛確居宗冲玄成德
齋物處外儉行安身草褐蒲衣食松餌术栖隱靈岳五
十餘年卓矣仙才飄然勝氣千尋萬頃莫測其涯寡人
欽承道風久餐德素頓遣使來遠此延屈冀得虔受上

法或建良緣至止甫爾未淹旬日厭塵羽化反真靈府
身體柔軟顏色不變經方所謂尸解也仙者哉誠復師
禮未申而心誠有在雖志嘗化猶愴于懷喪事所資隨
須供給霓裳羽蓋既且騰空空榔餘衣詎籍墳壟但杖
舄猶存示同俗法宜遣使人送還天台定葬是時自江
都至於天台在道多見則徒步云得放還至其舊居取
經書道法分遺弟子仍令自掃一房曰若有客至宜延
之於此然後跨石梁而去不知所之須臾屍柩至方知

其靈化時年八十二晉王聞而益異之賜物千段遣畫
工圖其狀貌令柳詵為之讚曰可道非道嘗道無名上
德不德至德無盈玄風扇矣問有先生夙練金液怡神
玉清石髓方軟雲丹欲成言追葛稚將侶茅盈我王選
屬爰感靈誠柱下暫啓河上沉精留符告信化杖飛聲
永思靈跡曷用攄情時披素繪如臨赤城

唐潘師正趙州贊皇人隋大業中度為道士師事王遠
知盡以道門隱訣及符籙授之師正清靜寡欲居於嵩

山之逍遙積二十餘年但服松葉飲水而已

李播淳風之父仕隋為高唐尉秩卑不得志棄官而為道士頗有文學自號黃冠子文集行於世

薛頤貞觀中為太史令請為道士許之仍拜中大夫為置紫府觀於九嶼之下申其高尚

馬蹟河東汾陰人少好玄言去俗為道士解天文律歷隋煬帝時引入玉清觀每加恩禮召令章醮

鄭誥為河南府叅軍郭仙舟為號州朱陽縣丞開元六

年投匭獻詩勅曰觀其文理是崇道法至於時用不切
事情宜各從所好並罷官為道士

韓思復為御史大夫性恬澹好玄言非察察之吏無幾
轉為太子賓客

司馬承禎字子微少好學出家為道士師事潘師正傳
其符籙及辟穀導引服餌之法師正特賞異之謂曰我
自陶隱居傳授正一之法法至汝四葉矣承禎嘗遍游
名山遂止于天台山則天聞其名召至都降手詔以贊

美之及將還勅麟臺監李嶠餞之於雒橋之東景雲二年睿宗令其兄承禕就天台起之至京入宮問以陰陽術數之事承禕對曰經曰為道日損損之又損以至於無為且心目所知見者每損之尚未能也復攻乎異端而增其知慮哉帝曰理身無為則清高矣理國無為如何對曰國猶身也老子曰游心於澹合氣於漠順物自然而無私焉而天下理易曰聖人者與天地合其德是知天不言而信無為而成無為之旨理國之道也睿宗

歎息曰廣成之言即斯是也承禎固辭還山乃賜寶琴
一張及霞紋帔而遣之朝中詞人贈詩百餘首開元九
年又遣使迎至京玄宗親受法籙前後賞賜甚厚十年
駕入都承禎又請還天台上賦詩以遣之十五年又召
至都上令承禎於玉屋山自選形勝置壇室以居焉
張果不知何許人也嘗著陰符經玄解盡其玄理後受
銀青光祿大夫號通玄先生

賀知章為祕書監授銀青光祿大夫天寶三載知章因

老疾恍惚不醒若神游洞天三清上數日方覺遂有志
入道乃上疏請度為道士歸捨本鄉宅為觀玄宗許之
仍拜其子典設郎曾為會稽郡司馬使侍養御製詩以
贈行皇太子已下咸就執別肅宗乾元元年十一月詔
曰故越州千秋觀道士賀知章器識夷淡襟懷和雅神
清志逸學富才雄挺會稽之美箭蘊崑岡之良玉故飛
名仙省侍講龍樓嘗靜默以養閒因談諧而諷諫以暮
齒辭祿載見款誠願追二老之踪克遂四明之客允叶

初志脫落朝衣駕青牛而不還狎白衣而長往丹壑非
息人琴兩忘惟舊之懷有深追悼宜加緝禮式展哀榮
可贈禮部尚書

王鉷為御史大夫天寶十載請捨宅為觀表曰臣聞道
本無為虛而必應行之者時乘六氣得之者壽越二儀
伏惟開元天地大寶聖神文武應道皇帝陛下高居衆
妙深契重玄降自三清元君俯為萬方聖主竊見朝之
上宰是曰大賢首學真宗先開道觀奉揚慈旨布淳化

於蒼生恭啓福因延休祐於皇極臣昧於聞道不敢思
齊瞻言報恩寧忘竊比且臣孤立明主所知竭力効官
義惟守死捐軀奉國誓不偷生所賜寵榮所蒙任使不
因人力特出聖衷加以前後糾彈頗抵忤公言成謗恐
不自明直道招愆甘為己分陛下聖明先覺真偽立分
燕客上書遙知是詐漢臣引過逾察其忠蒙獨照於聖
心免獲罪於浮議嘗憂萬死醜致九遷伏念殊私將深
罔極徒申荅効無補萬分臣舊宅在城南安化門內道

東第一家祖父相傳竹樹猶茂已更數代垂向百年同
蕭何之賣田誠為偏僻異晏嬰之近市稍遠囂塵臣於
中選其勝處減兼官之祿俸迴累賜之金帛盡除遺堵
創建遵堂廊宇既成功德將畢伏乞俯矜丹懇時降皇
慈因誕聖之辰克報恩之觀捧迎仙榜光映敝廬每至
三元八節之時天長乙酉之日臣得凜雪紛垢奉持齋
戒一心至願稽首尊容獻福聖躬永資保算千生頂戴
萬劫歸依雖蝼蟻之負細塵豈能裨岳而烏鵲之銜微

毛毳有志填河倘蒙睿澤曲流愚誠俯遂仰望許臣諸處
招灼然有行業道士二十七人嘗修香火無任感恩荷
德之至

楊綰雅尚玄言宗道擇二教著王開先生傳以見意位
至中書侍郎平章事

李勉字玄卿幼勤經史長而沉雅清俊宗於虛玄位至
太子太師

閻窠為吉州刺史德宗貞元七年請為道士從之賜名

遺榮

王紹為定武軍節度憲宗元和四年奏請於宿州置開元觀

晉梁文炬喜清靜之教聚道書數千卷企慕赤松留侯之事而尤盡其善位至太子太保致仕

冊府元龜卷八百二十二

欽定四庫全書

冊府元龜卷八百二十三 宋 王欽若等撰

總錄部

清談 蘊藉

清談

傅曰言談者身之文老子曰善言無瑕譴乃若和順內
積辭氣清越振金玉而條暢去枝葉之扶疏抵掌開談
應機晤對深造至理煥發仁聲析羣言之微妙為時輩

之傾仰扣之不竭聽者忘倦斯皆修飾雅調敷述精義
婉而成章著為令譽者也江左相尚流風最盛非夫識
度冲遠議論典正洞協名理作世模範者則無取焉

後漢孔宙字公緒陳留人能清談尚論噓枯吹生後為
豫州刺史

魏荀粲字奉倩潁川潁陰人也太和初到京邑與傅嘏
談嘏善名理而粲尚玄遠宗致雖同倉卒時或有格而
不相得意裴徽通彼我之懷為一家駢頌之粲與嘏

善夏侯玄亦親嘗謂嘏玄曰子等在世塗間功名必勝
我但識劣我耳嘏難曰能勝功名者識也天下孰有本
不足而末有餘者邪粲曰功名者志局之所獎也然則
志局自一物耳固非識之所獨濟也我以能使子等為
貴然未必齊子等所為也

管輅字公明冀州刺史裴徽檄召為文學從事一相見
清論終日不覺罷倦天時炎熱移牀在庭前樹下乃至
鷄向晨然後出

王弼字輔嗣少好學時淮南人劉陶善論縱橫為當時所推每與弼語嘗屈弼天才卓出當其所得莫能奪也裴徽為吏部郎弼未弱冠往造焉徽一見而異之問弼曰夫無者識萬物之所資也然聖人莫肯致焉而老子申之無已者何弼曰聖人體無無又不可以訓故不說也老子是有者也故嘗言無所不足尋亦為傳嘏所知于時何晏為吏部尚書甚竒弼歎之曰仲尼稱後生可畏若斯人者可與言天人之際乎卒於尚書郎

爰俞字世都清真貴素辯於論議採公孫龍之辭以談
微理少有能名辟太尉府稍歷顯位

晉裴遐善言玄理音辭清暢冷然若琴瑟嘗與河南郭
象談論一坐嗟服為東海王越主簿

郭象少有才理好莊老能清言太尉王衍每言聽象語
如懸河瀉水注而不竭卒於東海王太傅主簿

裴頠字季彥樂廣嘗與頠清言欲以理服之而頠辭論
豐博廣笑而不言時人謂頠為言談之林藪後為尚書

僕射侍中為費后所害

胡母輔之字彥國少擅高名王澄嘗語人曰彥國吐言如鋸木屑霏霏不絕誠後進領袖也後為楊武軍湘州刺史

王濟字武子為侍中每侍見未嘗不諮論人物及萬機得失濟善於清言修飾辭令諷議將順朝臣莫能尚焉王戎善發談端賞其要會朝賢嘗上巳禊雒或問王濟曰昨游有何言談濟曰張華善說史漢裴頠論前言往

行衮衮可聽王戎談子房季札之間超然玄著其為識
鑒者所賞如此後為司徒

王衍既有盛才美貌明悟若神嘗自比子貢兼聲名籍
甚傾動當世好善玄言惟說老莊為事每捉玉柄麈尾
與手同色義理有所不安隨即更改世道口中雌黃朝
野翕然謂之一世龍門矣累居顯職後進之士莫不景
慕倣效選舉登朝皆以為稱首後為太尉與石勒戰敗

遇害

樂廣尤善談論每以約言折理以厭人之心其所不知
默如也裴楷嘗引廣共談自夕申旦雅相欽挹歎曰我
所不如也尚書令衛瓘朝之者舊逮與魏正始中諸名士
談論見廣而竒之曰自昔諸賢既没嘗恐微言將絕而
今乃復聞斯言於君矣命諸子造焉曰此人之水鏡見
之瑩然若披雲霧而見青天也王衍自言與人語甚簡
至及見廣便覺已之煩其為識者所歎美如此後至尚

書令

阮瞻字千里讀書不甚研求而默識其要遇理而辨辭
不足而旨有餘見司徒王戎戎問曰聖人貴名教老莊
明自然其旨同異瞻曰將無同戎咨嗟良久即命辟之
時謂三語掾

阮修字宣子好易老善清言王衍當時談宗自以論易
畧盡然有所未了研之終莫悟每云不知比没當見能
通之者不衍族子敦謂衍曰阮宣子可與言衍曰吾亦
聞之但未知其亶亶之處何如及與修談言寡而旨暢

衍乃歎服焉後為太子洗馬被害

衛玠好言玄理其後多病體羸羸母嘗禁其語遇有勝日親友時請一言無不咨嗟以為入微琅瑯王澄有高名少所推服每聞玠言輒歎息絕倒故時人為之語曰衛玠談道平子絕倒謝鯤先雅重玠相見欣然言論彌日王敦謂鯤曰昔王輔嗣吐金聲於中朝此子復玉振於江表微言之緒絕而復續不意永嘉之末復聞正始之音何平叔若在當復絕倒為太子洗馬卒

祖納字士言最有操行能清言文義可觀後除光祿大夫

潘京荊州人舉秀才到雒尚書令樂廣與京同舟共談累日深歎其才謂京曰君天才過人恨不學耳若學必為一代談宗京感其言遂勤學不倦時武陵太守戴昌亦善談論與京共談京假借之昌以為不如己笑而遣之令過其子若思京方極其言論昌竊聽之乃歎服曰才不可假遂父子俱屈焉

孫盛字安國博學善言名理于時殷浩擅名一時與抗
論者惟盛而已盛嘗詣浩談論對食舊擲麈尾毛悉落
飯中食冷而復暖者數四至暮忘餐理竟不定累遷秘
書監加給事中

却超有重名時沙門支遁以清談著名于時風流勝貴
莫不崇敬意為造微之功足叅諸正始而遁嘗重超以
一時之雋甚相知賞後為司徒左長史

殷浩識度清遠弱冠有美名尤善玄言與叔父融俱好

老易融與浩口談則辭屈著論則融勝浩由是為風流
談論者所宗後至中軍將軍

謝安字安石弱冠詣王濛清言良久既去濛子修曰向
客何如大人濛曰此客亶亶為來逼人王導亦深器之
由是少有重名嘗與王羲之登冶城悠然遐想有高世
之志羲之謂曰夏禹勤王手足胼胝文王旰食日不暇
給今四郊多壘宜思自效而虛談廢務虛文妨要恐非
當今所宜安曰秦任商鞅二世而亡豈清言致患邪後

至太保贈太傅

張憑有志氣為鄉閭所稱舉孝廉負其才自謂必叅時
彥初欲詣劉悵鄉里及同舉者共笑之既至悵處之下
坐神意不接憑欲自發而無端會王濛就悵清言有所
不通憑於末坐判之言旨深遠足暢彼我之懷一坐皆
驚悵延之上坐清言彌日留宿至旦遣之憑既還船須
臾悵遣傳教覓張孝廉船便召與同載遂言之於簡文
帝帝召與語歎曰張憑勃宰為理窟

謝萬字萬石工言論簡文帝作相召為從事中郎萬着
白綸巾鶴氅裘履版而前既見與帝共談移日為豫州
刺史

謝朗字長度善言玄理文義豔發總角時病新起體甚
羸未堪勞於叔父安前沙門支遁講論遂至相苦其母
王氏再遣信令還安欲留使竟論王氏因出云新婦少
遭難一生所寄惟在此兒遂流涕携朗去終於東陽太

守

殷仲堪能清言每云三日不讀道德經便覺舌本間強其談理與韓康伯齊名士咸慕愛之後為荊州刺史

王濛為司徒左長史善清談謝安嘗稱美濛至長史語

甚不多可謂令音

又云濛恬暢能言名理

宋張敷性整貴文韻端雅好玄言善屬文初父邵使與高陽宗少文談繫象往復數番少文每欲屈拂塵尾歎曰吾道東矣於是名價日重卒於司徒左長史

袁豹善言雅俗每商較古今兼以誦詠聽者忘疲為太

尉長史

張鏡少與光祿大夫顏延之隣居談義飲酒喧呼不絕而鏡靜嘿無言聲後鏡與客談延之從籬邊聞之取胡床坐聽辭義清玄延之心服謂客曰彼有人焉由是不復酣呌卒於新安太守

宗炳字少文精於言理累徵太子庶子不應

南齊張緒吐納風流聽者皆忘饑疲見者肅然如在宗廟雖終日與居莫能測焉後至光祿大夫

徐嗣伯字叔紹有孝行善清言位正員郎諸府佐

劉繪為後進領袖敏悟多能時張融以言辭辯捷周顥
彌為清綺而繪音采不贍麗雅有風則時人為之語曰
三人共宅夾清漳張南周北劉中央言其處二人間也
後為大司馬從事中郎

張融字思光玄義無師法而神解過人白黑談論鮮能
抗拒後為司徒左長史

周顥每賓友會同顯虛席晤語辭韻如流聽者忘倦燕

善老易與張融相遇輒以玄言相滯彌日不解清貧寡
欲日長蔬雖有妻子獨處山舍甚機辯衛將軍王儉謂
顥曰卿山中何所食顥曰赤米白鹽綠菜紫葵文惠太
子問顥菜食何味最甚顥曰春初早韭秋末晚菘何屑
亦精信佛法無妻太子又問顥卿精進如何屑對曰三
塗八難共所未免然各有累太子曰所累伊何對曰周
妻何肉其言辭應變如此轉國子博士兼著作太學諸
生慕其風爭事華辨始著四聲切韻行於時

梁張卷字令遠少以知理著稱能清言位至都官尚書
伏曼容仕宋為尚書外兵郎嘗與袁粲罷朝相會言玄
理時論以為一臺二絕子暄幼傳父業能言玄理

張充能清言與從叔稷俱有令譽後為金紫光祿大夫
張嶠少方雅有志操能清言後為吳興太守

范縝性質直好危言高論不為士友所安惟與外弟蕭
琛相善琛名曰口辨每服縝簡詣為國子博士卒官

何朗字石明早有才思上清言周捨每與共談服其精

理歷官散騎侍郎

到洽美容質善談吐武帝嘗問待詔丘遲曰到洽如何

沈漑

洽漑之從父兄也

遲曰正情過於沈文章不減漑加以清

竒殆將難及後為潯陽太守

嚴植之少善莊老能立言累遷中撫軍記室叅軍

陳周弘正少通老子周易叔父侍中捨每與談論輒異
之後為右僕射領國子祭酒弘正善清談梁末為玄宗
之冠

龔孟舒善談名理位至大中大夫

後魏閻慶裔博識洽聞善於談論聽其言說不覺忘疲
為敷城太守卒

崔孝芬為吏部尚書博聞口辨善談論愛好後進終日
忻然商確古今間以嘲諷聽者忘疲

唐陸德明受學於周弘正善言玄理為國子博士卒

房瑄好賓客善談論為宰相無匪懈之意俱與庶子劉
秩諫議李何忌等高談虛論說釋氏因果老子虛無而

已後罷相久之為刑部尚書卒

楊綰雅尚玄言凡所知友皆一時名士或造之者清談終日未嘗及名或有容欲以世務干者見綰言必玄遠不敢發詞內媿而退後為中書侍郎平章事卒

蘊藉

傳云和順積中英華發外又云進退可度容止可觀斯蘊藉之謂也豈徒天資淑茂吟韻清婉蓋亦習尚書云矜持舉措與塵游而不雜在醜夷而不爭周旋君子之

儀縹緲有神仙之稱者矣若夫進對溫雅談論調暢陟
降軒陛側媚于天子回翔表著則鬱為士範型王言之
嘉獎聳朝論之欣慕至乃釋愠怒為悅豫去鄙吝為夷
曠加以服用玩好奢素各擅其所宜飲食宴集風流遂
成于故事間雅自喜姿致可觀內無媿于方人外有名
於競爽本其源出職自禮官逮漢官之肇興頗飾以儒
雅南朝寢盛冠絕向時元魏以還氣裕遷卓然其風標
峻爽詞調明朗規矩誠設從容以和者亦何嘗泯沒於

鄉曲間哉

漢司馬相如蜀郡成都人也車騎雍容間雅甚都

都間雅之

稱也終文園令

薛廣德為御史大夫為人溫雅有蘊藉

後漢馬援為伏波將軍援為人明白鬚髮眉目如畫閑於進對尤善述前事每言及三輔長者至間里少年皆可觀聽皇太子諸王聞者莫不屬耳忘倦

虞延字子大陳留人光武東巡路過小黃高帝母昭靈

金史卷之三十三
卷八十二
后園陵在焉時延為部督郵詔呼問園陵事進止從容
跽拜可觀帝善之

鄧衍為新野功曹以小子侯每預朝會容姿趨步有出
於衆明帝目之曰朕之容貌豈若此人特賜與焉

袁紹為冀州牧容貌端正威儀進止動見倣效

郭泰字林宗舉有道不應善談論美音制褻衣博帶周
游郡國嘗於陳梁間行遇雨中一角墊時人乃故折一
角以為林宗巾

魏孟達自蜀來歸文帝既至譙進見閒雅才辯過人衆莫不屬目終新城太守

蜀劉琰字威碩魯國人也先主在豫州辟為從事其宗姓有風流善談論厚親待之遂隨從周旋嘗為賓客車服飲食號為侈靡侍婢數十皆能為聲樂又悉教誦讀魯靈光殿賦

吳滕胤為人白皙威儀可觀每正朔朝賀修謹在位大臣見者莫不歎賞終衛將軍

晉樂廣與王衍俱託心事外名重於時故天下言風流者謂王樂為稱首焉廣終尚書令

王衍字夷甫神情明秀風姿詳雅妙善玄言每捉玉柄麈尾與手同色位至太尉尚書令

何邵字敬祖少與武帝同年有總角之好帝為王太子邵為中庶子及即位轉散騎常侍甚見親待邵雅有姿望遠客朝見必以邵侍直每諸方貢獻帝輒賜之而觀其占謝焉

溫嶠字太真風儀秀整美於談論見者皆愛悅之後為
驃騎將軍鎮武昌卒

庾亮為中書令以蘇峻之亂弄陶侃侃與亮談宴終日
亮啖薤因留白侃問曰安用此為亮云故可以種侃於
是尤相稱歎云非惟風流兼有為政之實後鎮武昌諸
佐吏殷浩之徒乘秋夜往共登南樓俄而不覺亮至諸
人將起避之亮徐曰諸君少住老子於此處興復不淺
便據胡牀與浩等談課

何充字次道風韻淹雅文義見稱能飲酒雅為劉悛所
貴悛每見次道飲曰令人欲傾家釀言其能溫克也充
為侍中錄尚書事

謝萬弱冠辟司徒掾遷右西屬不就簡文帝作相聞其
名為撫軍從事中郎萬著白綸巾鶴氅裘履版而前既
見帝共談移日

車武子善於賞會當時每有盛坐而武子不在皆云無
車公不樂謝安游集之日輒開筵待之武子終吏部尚

書

王裒陽城營陵人少禮操非禮不動非法不言身長八尺四寸容貌絕異音聲清亮辭氣韶雅隱居教授三徵七辟皆不就

王恭美姿儀人多愛悅或目之曰濯濯如春月柳嘗被鶴氅裘涉雪而行孟昶窺見之嘆曰此真神仙中人也恭後為平北將軍假節鎮京口

王獻之字子敬少有盛名而高邁不羈雖困居終日容

止不怠風流為一時之冠終中書令

王濛字仲祖與沛國劉恢齊名友善恢嘗稱濛性至通而自然有節濛每云劉君知我勝我自知時人以恢方荀奉倩濛比袁曜卿凡稱風流者舉恢為宗焉濛為司徒左長史

王珣為衛將軍加散騎常侍以疾辭職歲餘卒桓玄與會稽王道子書曰珣神情朗悟經史明徹風流之美公私所寄忽爾喪失歎悼之深

顧愷之每食甘蔗嘗自尾至本人或恠之云漸入佳境
官至散騎常侍

宋張敷特善音儀盡詳緩之致與人別執手曰念相聞
餘響久之不絕張氏後進至今慕之其源流起自敷也
終司徒左長史

羊欣少靜默無競於人善言笑美容止可觀官至中散
大夫

江夷美風儀善舉止歷任以和簡著稱位至湘州刺史

龔祈字孟道武陵人風姿端雅容止可觀中書郎范述
見而歎曰此荆楚仙人也祈時或賦詩言不及世事不
應徵辟

袁粲清整有風操自遇甚厚嘗著妙德先生傳以續嵇
康高士傳以自况後為中書監領司徒宅宇平素器物
取給好飲酒善吟諷獨酌園庭以此自適居負南郭時
杖策獨游素寡往來門無雜客

南齊褚淵美儀貌善容止俯仰進退咸有風則每朝會

百僚遠國莫不延首目送之宋明帝嘗歎曰褚淵能遲行緩步便持此得宰相矣位至司徒

檀超字悅祖高平人為國子博士兼左丞超嗜酒好言詠舉止和靡自以晉郗超為高平二超謂人曰猶覺我為優也太祖賞愛之

庾杲之為黃門郎風範和潤善音吐武帝令對魏使兼侍中帝每歎其風器之美王儉在座曰杲之為蟬冕所照更生風米陛下故當與其即真帝意未用也

金史卷八十三
王儉為僕射兼領祭酒十日一還學監試諸生申引在
庭劍衛令史儀容甚盛作解散髻斜插幘簪朝野慕之
相與倣效儉嘗謂人曰江左風流宰相惟有謝安蓋自
比也

江敷湛孫也為丹陽丞時袁粲為尹見敷歎曰風流不
墜正在江郎敷與宴賞流連日夜

封孝琰為通直散騎常侍孝琰文筆不高但以風流自
立善於談譁威儀間雅容止進退人皆慕之

張緒為尚書令益州獻蜀柳數株條甚長枝大若絲縷
時舊宮芳林苑始成武帝以植於太昌靈和殿前嘗賞
玩咨嗟曰此楊柳風流可愛似張緒少年時其見賞愛
如此

王儉為尚書令丹陽尹時諸令史問訊有一令史善俯
仰進止可觀儉賞異之問曰卿與誰共事荅云十餘歲
在張令門下儉目送之時尹丞殷璉在坐曰是康成門
人也

胡諧之為左衛將軍加給事中諧之風采環潤善自居處兼以舊恩見過朝士多與交游

徐孝嗣為太子右衛率轉長史兼侍中善趨步間容止與太宰褚淵相埒武帝深加待遇

梁謝顥宋末為豫章太守至石頭遂白服登烽火樓坐免官謁齊高帝自占謝言辭清麗容儀端雅左右為之傾目宥而不問

臧盾為尚書中兵郎盾美風姿善舉止每趨奏高祖甚

悅焉

到沈美風神容止可悅天監初遷征虜主簿高祖初臨天下收扶賢俊甚愛其才

到溉字茂灌美風儀善容止終於散騎常侍

賀琛為尚書左丞參禮儀事每見高祖與語嘗移晷刻故省中為之語曰上殿不下有賀琛容止都雅故時人呼之

何昌寓少而清淨幽獨不羣所交者必當世清名是以

風流籍甚位至侍中領驍騎將軍

陳蕭允少知名神彩凝遠通達有識鑒容止蘊籍動合
規矩起家邵陵王法曹叅軍

謝哲字穎預陳郡陽夏人美風儀舉止蘊籍而襟情豁
然為士君子所重官至散騎常侍中書令領前將軍

王場司空冲之第十二子也沉静有器局美風儀舉止
蘊籍梁大同中起家秘書郎

陸繕為太子中庶子領步兵校尉掌東宮管記繕儀表

端麗進退間雅世祖使太子諸王咸取則焉其超步躡履令習繕規矩

後魏張濟字士度涉獵書傳清辨美儀容道武愛之引侍左右與公孫表等俱為行人拜散騎侍郎

崔朗美容貌涉獵經史少溫厚有風俗以軍功起家震威將軍

畢祖彥涉獵書傳風度間雅為時所知為光祿大夫王誦字國章融之子學涉有文才神氣清雋風流甚美

位至給事黃門侍郎

李諧字虔和風流間潤博學有文辨當時才士咸相欽賞終於秘書監

劉藻字彥先涉獵羣籍美談笑善與人交為太尉司馬裴粲沉重美風儀歷正平弘農二郡太守高陽王雍曾以事屬粲不從雍甚為恨後因九日馬射勅畿內太守皆赴京師雍時為州牧粲往修謁雍含怒待之粲神情間邁舉止抑揚雍目之不覺解顏及坐定謂粲曰相愛

舉動可更為一行粲便下席為行從容而出坐事免官
後宣武聞粲善自樹置欲觀其風度忽令傳詔就家急
召之須臾之間使者相屬合家恐懼不測所以粲更恬
然神色不變帝歎異之

北齊高乾性明悟俊偉有智畧美音容進止都雅為府
儀同三司徐州刺史

崔陵狀貌偉麗善於容止少有名望為當時所知為東
兗州刺史

楊惛幼聰敏好學及長能清言美風神俊悟容止可觀
人士見之莫不敬異有識者多以遠大許之後為驃騎
大將軍開封府王

裴讓之字士禮為文褻主薄兼中書舍人文褻嘗入朝
讓之導引容儀蘊藉文褻目之曰士禮佳舍人遷長史
兼中書侍郎領舍人

王昕北海劇人為銀青光祿大夫判祠部尚書事生九
子並風流蘊藉世號王氏九龍

盧昌衡衛尚書左僕射道虔之子尚書王昕以雅談獲
罪諸弟尚守而不墜自茲以後此道浸微昌衡與頓丘
李若彭城劉珉河南陸彥師隴西辛德源太原王循並
為後進風流之士

沈靖有才識風儀蘊藉容止可觀為尚書郎後與柳機
少有令譽風儀辭令為當世所推官至華州刺史

獨孤信武川人美容儀風度弘雅善騎射以北邊喪亂
避地中山為葛榮所獲信既少年好自修飾服章有殊

金史卷之二十三
於衆軍中號為獨孤郎以軍功拜安南將軍為秦州刺史時因獵日暮馳馬入城其帽微側詰旦而吏人有戴帽者咸慕信而側帽焉其為衆庶所重如此

周惠達幼有志操好讀書美容貌進退可觀見者莫不重之為儀司三司

王褒字子淵識量淹通志懷沉靜美風儀善談笑終於宜州刺史

柳霞幼而聰邁神采嶷然梁西昌侯琛藻鎮雍州霞時

年十二以民禮修謁風儀端肅進止詳雅琛藻美之試
遣左右踐霞衣裾欲觀其舉措霞徐步稍前曾不顧盼
終於霍州刺史

楊雄初名惠美姿容器度雍容閑雅進止可觀官至江
陵總管

隋柳謩之字公正身長七尺五寸儀容甚奇風神爽亮
進止可觀轉守廟下士周武帝有事太廟謩之讀祝文
音韻清雅觀者屬目帝善之擢為宣納上士

元善雒陽人以風流蘊藉俯仰可觀音韻清朗聽者忘倦由是為後進所歸開皇初拜內史侍郎高祖每望之曰人倫表儀也凡有敷奏詞氣抑揚觀者矚目

唐杜如晦少聰悟美風調精彩絕人及長雍容儒雅好談文史每以風流自命官終尚書左僕射

崔日用美容止善談笑少舉進士為并州長史

李紆為吏部侍郎厚自奉養舉馬極鮮明以放達蘊藉稱於時

韋夏卿有風韻善談讌與人相親終年而喜愠不形於色為太子少保卒

李迥秀為鳳閣鸞臺平章事雅有文才飲酒斗餘廣接賓朋當時稱為風流之士

權德輿自貞元元和三十年間羽儀朝行性真亮寬恕動作語言一無外飾蘊藉風流為時稱嚮官終山南西道節度使

周和凝字成績幼而聰敏姿狀秀拔神彩射人性好修

整自釋褐至登台輔車服僕從必加華楚進退容止偉人也位至太子太傅

冊府元龜卷八百二十三

欽定四庫全書

冊府元龜卷八百二十四 宋 王欽若等 撰

總錄部

名字

古稱孩而名之冠而字之蓋以名者義之制字者名之飾先民之論其亦多矣故吐情自紀名以示謙均體相稱字以為重質文既變單兼并興要在順言亦無定義然五廢之說慮防大物三復之旨彌昭景行隨時損益

其說靡記至有兆興天賦叶應夢受命卜筮以考休吉稽事類以擇淑令或避嫌變易或受賜旌別咸有倫理率用論次傳曰人治之大也可不慎歟

唐叔虞者周武王子而成王弟初武王與叔虞母會時

叔虞母曰邑姜武王后齊太公女

夢天謂武王曰余命女生子名虞余

與之唐及生子文在其手曰虞故遂因命之曰虞

晉穆侯七年伐條生太子仇十年伐千畝有功生少子名成師晉人師服曰異哉君之命子也太子曰仇仇

者讐也。少子曰成師，成師大號成之者也。名自命也，物自定也。今適庶名返逆，此後晉其能毋亂乎？成師封于曲沃，其後代有晉國。

魯桓公子同生，公問名於申繻。對曰：名有五，有信、有義、

有象、有假、有類。

申繻魯大夫

以名生為信。

若唐叔虞魯公子友

以德命

為義。

若文王名昌武王名發

以類命為象。

若孔子首象尼丘

取於物為假。

若伯魚人有饋之魚因名之曰鯉

取於父為類。

若子同生與父同日

不以國

國君

之子不自以本國為名也

不以官，不以山川，不以隱疾。

隱痛疾患避不祥也

不

以畜牲

畜牲六畜

不以器幣

幣玉帛

周人以諱事神名終將諱

之

君父之名固非臣子所斥然禮既卒哭以木鐸徇曰舍故而諱新謂舍親盡之祖而諱新死者故言以諱

事神名終將諱之自父至高祖皆不敢斥言

故以國則廢名

國不可易則廢名

以官

則廢職以山川則廢主

改其山川之名

以畜牲則廢祀

名猪則廢猪名

羊則廢羊

以器幣則廢禮晉以僖侯廢司徒

僖侯名司徒廢為中軍

宋

以武公廢司空

武公名司空廢為司城

先君獻武廢二山

二山具啟名也

魯獻公名具武公名啟更以其鄉名山

是以大物不可以命公曰是其生

也與吾同物命之曰同

物類也謂同日

季友桓公之季文姜之愛子始震而卜卜人謁之曰生

有嘉聞

嘉聞名於世

其名曰友為公室輔及其生如卜人之

言有文在其手曰友遂以名之

畢萬畢公高之後也獻公以魏封畢萬為大夫卜偃曰
畢萬之後必大矣萬滿數也魏大名也以是始賞天開
之矣天子曰兆民諸侯曰萬民今命之大以從滿數其
必有衆

惠公亡在梁梁伯以其女妻之生一男一女梁伯卜之

男為人臣女為人妾故名男為圍女為妾

叔孫得臣魯大夫敗狄于鹹獲長狄僑如

僑如即瞞國之君蓋長三

丈獲僑如不書賊夷人也

以命宣伯

得臣待事而名其一子因名宣伯曰僑如以旌其功

苦越

生子將待事而名之

苦越苦夷

陽州之後獲焉名之曰陽州

欲比僑如

叔梁紇魯人與顏氏女野合禱於尼丘魯襄公二十二

年而孔子生生而首上圩頂故名曰丘云字仲尼

鄭武公娶于申曰武姜生莊公及共叔段莊公寤生敬焉

姜氏故名曰寤生

衛侯辟疆朝於周行人問其名荅曰衛侯辟疆周行人還之曰啓疆辟疆天子之號諸侯弗得用衛侯更其名曰燬然後受之

齊惡為卿而衛侯名惡君臣同名也君子不奪人名不奪人親之所名重其所以來也王父名子也

不奪人名謂親之所

名明臣號欲改君不當聽也君不聽臣易名者欲使人重父命也父受名于王父王父卒則稱王父之命名子

若敖楚大夫娶于鄖

鄖國名

生鬬伯比若敖卒從其母畜

於郕也畜養淫於郕子之女生子文焉郕夫人使棄諸夢

中夢澤名湖廣安陸縣城東南有雲夢城虎乳之郕子田見之懼而歸夫

人以告告女私通以出遂使收之楚人謂乳為穀謂虎為於菟

故命之曰鬬穀於菟以其女妻伯比伯比所淫者實為令尹

子文其後楚滅若敖氏其孫箴尹克黃使於齊還王曰

子文無後何以勸善使復其所改命曰生易其名也

鄭文公有賤妾曰燕姑姑南燕姓夢天使與已蘭蘭草曰余為

伯儵余而祖也伯儵南燕祖以是為而子以蘭為女子名以蘭有國

香人服媚之如是

媚愛也欲令人愛之如蘭

既而文公見之與之蘭

而御之詞曰妾不才幸而有子將不信敢徵蘭乎

懼將不見

信故欲計所賜蘭為懷子日穀

公曰諾生穆公名之曰蘭

漢蒯通本與武帝同諱其後史家追書為通項羽時欲封之通不受

趙同文帝時宦者本名談司馬遷避父名改為同

趙王積當韓王信孫也信之八匈奴與太子俱及至積

當城生子因名曰積當

司馬相如名犬子

父母愛之不為稱故為此名也

相如既學慕藺相如

之為人也更名相如後為郎

谷永本名竝以尉氏樊竝反更名永後曲陽侯根為驃騎將軍薦永為大司農

劉向初名更生元帝時為恭顯所譖遂廢十餘年成帝即位顯等伏辜更生乃復進用更名向位至光祿大夫

劉歆哀帝建平元年改名秀字穎叔

河圖赤伏符云劉秀發兵捕不道四

夷雲集龍闢野四七之際火為主故改名期以應符

累遷至中壘校尉王莽篡位

以為國師

後漢劉平本名曠明帝後改為平官至宗正

馬客卿援子也幼而岐嶷年六歲能應接諸公專對賓客嘗有死罪亡命者來過客卿逃匿不令人知外若訥而內沉敏援甚竒之以為將相器故以客卿字焉援卒後客卿夭沒

張霸字伯饒七歲能通春秋復欲進餘經父母曰汝小未能也霸曰我饒為之故字曰饒焉後為侍中

虞詡祖父經為郡縣獄吏嘗稱曰東海于公高為里門
而其子定國卒至丞相吾決獄六十年矣雖不及于公
其庶幾乎子孫何必不為九卿邪故字詡曰升卿武平
故城有碑云詡字定安蓋詡之別字也後詡果為尚書
令

服虔初名重又名祗後改為虔官至九江太守

袁賀字元服祖父京為侍中安帝始加元服百僚會賀
臨裝垂出而孫適生喜其嘉會因名字焉

傅燮字南容本字幼起慕南容三復白圭乃改焉後為漢陽太守

鄭玄子益恩以孔融為黃巾所圍益恩赴難隕身有遺

腹子玄以其手文似已名之曰小同

又云小同以丁卯日生而玄丁卯歲

生故名小同

至魏高貴鄉公時為侍中

趙岐初名嘉生於御史臺因字臺卿

以其祖為御史故生於臺也

後

避難故自改名字示不忘本土也後為太常

魏杜畿子理字務仲少而機密精要畿奇之故名之曰

理年二十一而卒

程昱少時嘗夢上泰山兩手捧日昱私異之以語荀彧及兖州反賴昱得完三城於是彧以昱夢白太祖太祖曰卿當終為吾腹心昱本名立太祖乃加其上日更名昱也文帝踐阼為衛尉卿進封安鄉侯

王昺為司空嘗為其兄子及子作名字皆依謙實以見其意故兄子默字處靜沈字處道其子渾字玄冲深字道冲遂為書戒之

事見訓子門

鄧艾字士載少孤太祖破荊州徙汝南為農民養犢年
十二隨母至潁川讀故太丘長陳實碑文言文為世範
行為士則艾遂自名範字士則後宗族有與同者故改
焉後以定蜀功為太尉

令狐愚字治公本名浚文帝黃初中為和戎護軍烏桓
校尉田豫討胡有功小違節度愚以法繩之帝怒械繫
愚免官治罪詔曰浚何愚遂以名之正始中為曹爽長
史後出為兗州刺史

吳孫靈景太子帝為靈及其弟作名詔曰人之有名以
相紀別長為作字憚其名耳禮名子欲令難犯易避五
十稱伯仲古或一字今人競作好名好字又令相配所
行不副此瞽字伯明者也孤嘗哂之或師友父兄所作
或自己為師友尚可父兄猶非自為最不謙孤今為四
男作名字太子名靈靈音如湖水灣澳之灣字茝茝音
如迄今之迄今子名靈靈音如兕觥之觥字霁霁音如
玄磧首之磧次子名詎詎音如草莽之莽字晷晷音如舉物之

舉次子名寇寇音如褒衣下寬大之褒字斐斐音如有
所擁持之擁此都不與世所用者同故鈔舊文會合作
之夫書八體損益因事而生今造此名字既不相配又
字但一庶易棄避其普告天下使咸聞知

顧雍從蔡邕學專一清靜敏而易教伯喈

字邕

貴異之謂

曰卿必成器今以吾名與卿故雍與伯喈同名繇此也
又字元嘆言為蔡邕之所嘆因以為字焉後進封醴陵
侯代孫邵為丞相平尚書事

滕牧本名密避丁密改名牧丁密避牧名改為固

滕牧
皇后

之父丁固為御史大夫更改名以相迴避

晉賈充字公閭父達魏豫州刺史陽里亭侯晚始生充言後當有充閭之慶故以為名字焉伐吳之役為使持節假黃鉞大都督

阮孚字遙集其母即胡婢孚之初生其姑取王延壽魯靈光殿賦曰胡人遙集其上楹而以字焉

石崇字季倫生於青州故小名齊奴官至衛尉

趙至字景真年十六游學至鄴隨嵇康還山陽改名浚
字允元幽州三辟部從事

庾袞四子恂茂澤据在澤生故名澤生因据故名据
袞鄉黨薦之州郡交命皆不降志世遂號之為異行
許邁字叔玄少恬靜不務仕進後登臨安西山茹芝服
氣有終焉之志乃改名玄字遠游與婦書告別自後莫
測所終好道者謂之羽化

虞預本名茂犯名明穆皇后母諱故改焉後除散騎常

侍仍領著作

桓溫字元子宣城太守彝之子生未朞而太原溫嶠見之曰此兒有竒骨可試使啼及聞其聲曰真英物也彝以嶠所賞故遂名之曰溫嶠笑曰果爾後將易吾姓也後為大司馬

桓豁為征西大將軍初聞苻堅國中有謠云誰謂爾堅石打碎豁有子二十人皆以石為名以應之唯石虔石秀石民石生石綏石康知名

張天錫字純嘏小名獨活初字公純嘏入朝人笑其三
字因自改焉時安定梁景敦煌劉肅竝以門胄總角與
天錫友昵張邕之誅景肅有勲天錫深德之賜姓張氏
又改其字以為巳子天錫諸子皆以大為字故景曰大
奕肅曰大誠

符洪父懷歸部落小帥先是隴右大雨百姓苦之謠曰雨
若不止洪水必起故因名曰洪

後燕慕容垂字道明號之第五子少岐嶷有器度身長七

尺四寸手垂過膝銳甚寵之嘗目而謂諸弟曰此兒闊
達好奇終能成家故名霸字道業恩遇踰於世子垂少
好畋游因獵墜馬折齒慕容儁僭即王位改名缺外以
慕容缺為名內實惡而改之尋以讖記之文乃去夬以
垂為名焉

後涼呂光生于枋頭夜有神光之異故以光為名

宋王懿字仲德父事苻堅至二千石堅敗仲德與兄叡
南奔晉太元末徙居彭城兄弟名犯晉宣元二帝諱並以

字稱獻字元德懿官至鎮北大將軍

王鎮惡北海劇人祖猛仕苻堅任兼將相父休為河東太守鎮惡以五月五日生家人以俗忌欲令出繼踈宗猛見竒之曰此非常兒昔孟嘗君惡日生而相齊是兒亦將興吾門矣故名之為鎮惡後位至安西司馬征虜將軍

孫處字季高籍注季高故字行於世位至振武將軍劉義宗高祖弟道憐之子幼為高祖所愛字曰伯奴

王裕之字敬弘名與高祖諱同故以字行後為尚書僕射

謝景仁名與高祖諱同故稱字位至左僕射

褚叔度名與高祖諱同故以字行後為征虜將軍雍州刺史

張茂度名與高祖諱同故稱字終於會稽太守

孔靖字季恭名與高祖祖諱同故稱字後為侍中

謝密字弘微繼叔峻後名犯所繼內諱故以字行位至

右衛將軍

羊玄保二子太祖竝賜名其一曰咸二曰粲謂玄保曰欲令卿二子有林下正始之餘風位至散騎常侍

向靖字奉仁小字彌名與高祖祖諱同故稱小字終於散騎常侍

張景胤為侍中小名查父邵小名梨文帝戲之曰查何如梨荅曰梨是百果之宗查何敢比

范曄母如廁產之額為墉所傷故以墉為小字官至太

子詹事

顏竣為丹陽尹未有子而大司馬江夏王義恭諸子為元凶所殺後各產男孝武自為製名名義恭子為伯禽以比魯公伯禽周公旦之子也名竣子為辟疆以比漢侍中張良之子

劉湛負其志氣嘗慕汲黯崔琰為人故名長子曰黯字長孺第二子曰琰字季珪官至散騎常侍太子詹事蕭惠開初名慧開後改慧為惠後為少府加給事中

徐爰字長玉本名瑗後以與傅亮父同名改為爰終於
中散大夫

袁粲父濯早卒祖母哀其幼孤名之曰愍孫愍孫幼慕
荀奉倩之為人白孝武求改名為粲不許又言於明帝
乃改粲字景倩焉累遷中書監司徒侍中

董仲舒本名蠻帝謂曰人名蠻復何容得蘊藉乃改名
為仲舒謂曰今日仲舒如何昔日仲舒荅曰昔日仲舒
出自私庭今日仲舒降自天地以此言之勝昔遠矣

王琨父懌不慧侍婢生琨名為崑崙懌後娶南陽樂玄女無子改名琨立以為嗣琨後位至侍中

王彧字景文名與明帝諱同故稱字位至中書監領太子太傅常侍揚州刺史

張興世字文德本單名世明帝益為興世後為通直散騎常侍左衛將軍

蔡興宗幼為父廓所重謂有已風與親故書曰小兒神氣似可不入非類不狎小人故以興宗為之名興宗為

之字後為散騎常侍中書監

劉胡本名坳胡以其顏面坳黑故以為名及長以坳胡
難道單呼為胡

謝莊五子颺肱顥從淪世謂莊名子以風景山水位
至中書令

南齊薛深本名道深避高帝偏諱改焉後為司州刺史
右將軍

薛淵汾陰人本名道淵避高帝偏諱改之終於平北

將軍

江泌少有孝行泌族人兗州治中泌與同名世謂泌為孝江以別之後為南康王侍讀卒

曹虎本名虎頭武帝以虎頭名鄙勅改之官至散騎常侍

劉懷慰本名閻慰武帝以其與舅氏名同勅改之後為安陸王北中郎司馬卒

王晏子德元有意尚至車騎長史德元初名湛武帝謂

晏曰劉湛江湛並不善終此非佳名也晏乃改之至是與弟晉安王友德和俱被誅

張敬兒本名苟兒明帝以其名鄙改焉弟恭兒本名豬兒後隨敬兒改名敬兒官至車騎將軍

梁劉顯為邵陵王長史本名頰初仕齊武帝以字難識改名顯

張稷齊末同廢東昏雖居朝右每慙口實乃名其子伊字懷尹霍字希光峻字農人同字不見見字不同以旌

其功稷官至鎮北將軍

王騫字思寂本字玄成與齊高祖偏諱同故改焉位至給事中領射聲校尉

劉峻本名法武宋泰始初魏尅青州峻年八歲與兄並為所畧齊永明中奔江南更改名峻字孝標兄法鳳改名孝慶字仲昌安成王遷荊州引峻為戶曹叅軍復以疾去

馬仙琕幼名仙婢及長以婢名不典以王代女因成琕

云後為都督豫北豫霍三州諸軍事

何敬容唯有一子年始八歲在吳臨還與兄肩別兄問
名敬容曰乃欲就兄求名兄即命紙筆名曰毅書云兩
玉曰毅吾與弟二家共此一子所謂毅也敬容官至侍
中太子詹事卒

王泰字仲通慈之子從弟筠字元禮一字德柔慈弟揖
之子沈約嘗曰王有養炬謝有覽舉養泰小字炬筠小
字泰位至吏部尚書

袁昂為黃門侍郎本名千里武帝謂曰昂昂千里之駒在卿有之今改卿名昂即字千里

謝蘭字希如年五歲每父母未飯乳媪欲令蘭先飯蘭曰既不覺饑強食終不進舅阮孝緒聞之歎曰此兒在家則曾子之流事君則蘭生之匹因名曰蘭吏部尚書蕭子顯表其至行擢為王府法曹累遷外兵記室參軍卒

豫章王綜字世謙普通六年奔于魏改名纘字德文

張嵯字四山嵯父稷為剡令至嵯亭生之因名嵯字四山累遷吳興太守

到鏡字圓照初在孕其母夢懷鏡及生因以名焉

顏協字子和元帝出鎮荊州為記室時吳郡顧協亦在蕃邸與協同名才學相亞府中稱為二協

陳周文育初本姓項氏名猛奴年十一義興人周薈為壽昌浦口戍主見而奇之因名與語文育對曰母老家貧兄弟並長大困於賦役薈哀之乃隨文育至家就其

母請文育養為己子母遂與之及薈秩滿與文育還都見於太子詹事周捨請製名字捨因為立名文育字景德官至散騎常侍鎮南將軍

韓子高會稽山陰人也家本微賤侯景之亂寓在京都景平文帝出守吳興子高年十六猶總角容貌美麗狀似婦人於淮渚附部伍寄載欲還鄉文帝見而問之曰能事我乎子高許諾子高本名蠻子文帝改名之

陸辯惠侍中繕之子年數歲詔引入殿內辯惠應對進

退有父風宣帝賜名辯惠字敬仁

毛喜為宣帝府記室文帝謂宣帝曰我諸子皆以伯為名汝諸兒宜用叔為稱宣帝以訪于喜即條牒自古名賢杜叔英虞叔卿等二十餘人啓文帝文帝稱善

蔡徵字希祥七歲丁母憂居喪如成人禮繼母劉氏性悍忌視之不以道徵供侍益謹初無怨色徵本名覽父景歷以為有王祥之性更名徵字希祥官至給事中

後魏古弼為門下奏事以敏正著稱太宗嘉之賜名曰

筆取其直而有用後改名弼言其輔佐才也

吳喜吳興臨安人本名喜公明帝減為喜位至散騎常侍淮陽太守

源賀為征西將軍從駕臨江為前鋒大將軍賀本名破羌是後也太武曰人之立名宜其得實何可濫也賜名賀焉賀子思禮後賜名懷

堯暄字辟邪本名鍾葵後賜為暄官至大司農

薛謹長子初古拔一曰車輅拔本名洪祚太武賜名拔

秦明王翰曾孫禎為都牧尚書禎生子瑞初瑞母尹氏有娠致傷後晝寢夢一老翁具衣冠告之曰吾賜汝一子汝勿憂之寤而私喜又問筮者筮者曰大吉未幾而生瑞禎以為協夢故名瑞字天賜位至太中大夫

濟南王彧本名亮字士明侍中穆紹與彧同署避紹父諱啟求改名詔曰士明風神運吐嘗自以比荀文若可名彧以取定體相倫之美

元匡字建扶性耿介有器節文成器之謂曰叔父必能

儀刑社稷裨輔朕躬今可改名為匡以成克終之美

張白澤本名鍾葵獻文賜名白澤位至殿中尚書

上黨王孫冀歸始六歲襲爵降為公孝文以其幼承家

業賜名稚字承業

鄧良奴弟侍孝文賜名述歷吏職以貞謹見稱稍遷中大夫

穆泰駙馬都尉南部尚書貞之子孝文賜名焉

庾岳初名業延賜名岳官至相州刺史

于忠本名千年孝文帝太和為武騎侍郎因賜名登
宣武時為左中郎將有功帝曰先帝賜名登誠為美稱
朕嘉卿忠款今改名忠既表貞固之誠亦所以名實相
副也

封磨奴為懷州刺史卒以族子叔念為後孝文賜名回
回父鑒即慕容暉太尉奕之後也

李承長子韶字元伯學涉有器量焉弟彥虔羸竝為孝
文賜名

裴駿字神駒幼而聰慧親表異之稱為神駒因以為字
位至中書侍郎

常閭為武都太守弟珍字靈智孝文賜名

高閭本名驢司徒崔浩見而奇之乃改為閭而字焉終
光祿大夫

崔景儁歷侍御史主文中散受勅接蕭贍使蕭琛范雲
高祖賜名為逸

高祐字子集小名次奴本名禧以與咸陽王名同孝文

賜名祐位至光祿大夫卒

楊津字羅漢本名延祚孝文賜名焉後為侍中驃騎大將軍兼尚書令

楊播本字元休太和中孝文賜名播弟椿字延壽本字仲孝太和中與播俱蒙孝文賜名播官至安西將軍華州刺史

宋弁為尚書殿中郎中孝文曾因朝會之次歷訪治道弁年少官微自下而對聲姿清亮進止可觀孝文稱善

者久之因是大被知遇名為弁意取弁和獻玉楚王不知寶之也

崔光本名孝伯字長仁孝文賜名焉嘗為國子祭酒再進位太保固辭不受卒

張烈字徽仙孝文賜名曰烈仍以本名為字焉官至安北將軍瀛州刺史

孫惠蔚為光祿大夫先單名蔚宣武正始中侍講禁內夜論佛經有愜帝旨詔使加號惠蔚法師焉

游肇字伯始孝文賜名尚書令高肇宣武之舅為百僚
攝憚名與已同欲令改易肇以孝文所賜秉志不許高
肇甚銜之宣武嘉其剛梗

侯剛為從僕射宣武以其質直賜名剛焉

虞誕本名恭祖為黃門侍郎孝明帝賜名曰誕

北齊高思好本浩氏之子以騎射事文襄及文宣受命
為左衛大將軍本名思孝天保五年討蠕蠕文宣悅其
驍勇謂曰爾擊賊鷁入鴉羣宜思好事故改名焉累官

至尚書令

斛律金性質直不識文字本名敦苦其難署改名為金從其便易猶以為難司馬子如教為金字作屋況之其字乃就終於太師

潘樂字相貴累遷河東郡王樂初生有一雀止其母左肩占者咸言富貴之徵因名相貴後以為字

趙彥深本名隱避廟諱改以字行彥深位至司徒

李稚廉齊州刺史義深之弟稚廉少而寡欲為兒童時

初不從家人有所求請嘗故以金寶授之終不取強付輒擲之於地州牧以其蒙稚而廉故名曰稚廉

高昂字敖曹幼有志氣其父曰此兒不減吾族當大吾門以其昂藏敖曹故以名字之位至司徒為軍司大都督

盧斐字子章性殘忍以強斷知名文襄引為府刑獄參軍謂之云狂簡斐然成章非佳名字終於尚書左丞

後周薛端為吏部尚書性強直每有奏請不避權貴太

祖嘉之故賜名端欲令名實相副

劉亮本名道德遷車騎大將軍以勇敢見知為當時名將太祖賜名亮并賜姓侯莫陳氏

獨孤信本名如願為隴右十一州大都督太祖以其信著遐邇故賜名為信

楊忠為太祖帳下嘗從太祖狩於龍門忠獨當一猛獸左挾其腰右拔其舌太祖壯之北臺謂猛獸為拵于因以字之

長孫儉本名慶明為大行臺兼相府司馬太祖曰名實理須相稱尚書既志安貧素可改名儉以彰雅操

伊婁穆善騎射為太祖所知太祖嘗謂之曰昔伊尹保衡於殷致王堯舜卿既姓伊庶卿不替前緒於是賜名尹焉位至小司馬卒

王勇為衛大將軍邛山之戰勇率敢死之士三百人並執短兵大呼直進出入衝擊殺傷甚多敵人無敢當者是役也大軍不利唯勇及王文達耿令貴三人力戰皆

有殊功太祖於是賞帛二千疋令自分之軍還皆拜上
州刺史以雍州岐州北雍州擬授勇等然州頗有優劣
又令探籌取之勇遂得雍州文達得岐州令貴得北雍
州仍賜勇名為勇令貴名豪文達名傑以彰其功

高琳母嘗於泗濱獲一石光彩朗潤是夜夢見一人謂
之曰夫人向所將來之石是浮磬之精若能寶持必生
令子其母驚寤便舉身流汗俄而有娠及生因名琳字
秀珉焉官至大將軍

陸逞字季明初名彥字世雄太祖嘗從容謂之曰爾既
溫裕何因乃字世雄非所宜也於爾兄弟又復不類遂
改焉後為太子太保卒

裴俠魏大統三年領鄉兵從戰沙苑先鋒陷陳俠本名
協至是太祖嘉其勇決乃曰仁者必有勇命名俠焉終
於工部中大夫

劉璠字祥字休徵幼而聰惠占對俊辨賓客見者皆號
神童事嫡母以至孝聞其伯父黃門郎璆有名江左在


嶺南聞而竒之乃令名祥字休徵後以字行官至長安令

蕭世怡鄱陽王恢之子歸國以名犯太祖諱故稱字焉後為蔡州刺史卒

黎景熙字季明少以文字行於世位至車騎大將軍卒王德喪父貧無以葬乃賣子公奴并一女以營葬事因遭兵亂不復相聞後德在平涼始得公奴遂名曰慶

叱羅協本名與高祖諱同後改焉位至儀同三司賜

爵南陽郡公



冊府元龜卷八百二十四